

10. Marts 2023

UPA2023/103

Matumuuna Inatsisartut Suleriaasiat § 33 najoqqutaralugu aalajangigassatut siunnersuut saqqummiuppara:

**Kommuunit oqaloqateqatigalugit inuit napparsimanermik pissuteqartumik suliffissarsiortut ikiorsiissutinik qinnuteqartut qanoq pitsaanerpaamik aalajangiinissap tungaanut aningaasartuutiminnik akissaqarnissaannut sullinneqarnissaannik qulakkeerinninnissamut Naalackersuisut peqquneqarnissaannik Inatsisartut aalajangiiffisissaattut siunnersuut.**

(Inatsisartuni ilaasortaq Doris J. Jensen, Siumut)

**Tunngavilersuut:**

Inuk kinaluunniit nappaammik eqqorneqarsinnaavoq, aamma kinaluunniit ullormiit ullormut piumasarinngisamik suliffissaarussinnaavoq ajutoorneq pissutaalluni. Inuit amerlasuut tamanna misigisarpaat, kræfteqalerluni, qaratsakkut aanaartoorluni, taqqamik milittoorluni, tarnikkut napparsimalerluni imaluunniit ajutoorluni.

Amerlasuut eqqorneqartut, inuunermik misilittagaqarput aamma ukiorpassuarni nuna sullissimasarpaat. Tamakku timikkuinnaanngitsoq eqqorneqartarput, amerlasuutigulli aaqqissuusaanermit kukkusumik sullinneqartarput. Ilaat ineqarnermut akiliisinnaajunnaartarput aamma sivisuumik ikiorserneqarneq ajorput, allaat ilaat ukioq ataaseq sinnerlugu ikiorserneqarneq ajorput. Tupinnanngitsumik amerlasuut Danmarkimut nuuttarput, ikiorsiissummik eqqortumik pissarsineq ajoramik. Taamaattumik siunnersuutigaara inuit nammineq pisuussutiginnngisaminnik suliffissaaruttut sukkasuumik ikiorserneqarnissaannik Naalackersuisut suliniuteqassasut. Ajornartorsiut qaangerumallugu.

Pisortat § 37 apeqqutit nr. 044-2023 tunngavigalugit nalunaarput, "suliamik suliarinninnermut piffissaqassasoq naatsorsuutigisariaqarpoq".

Uani pingaaruteqarpoq piffissamik aalajangersaanissaq, piffissaliussap killinga, tassani innuttaasoq ikiorsiissummik tigusaqarnissamut pisinnaatitaaffeqartup, allaffissornikkut kinguarsarneqaqqunagu, pisuni ilaanni ulluinnarni inuunermut aningaasarliorfiulersumi pisortat sullissinerat kigaappallaaqimmat. Tassani aamma kommunini assigiinngissutsit qaqugu inuk ikiorsiissutinik tunineqarsinnaasup tunineqarnissaasa assigiinngissutaat, taamaattoqartillugu sukkanerpaamik innuttaasoq ikiorsiissummik pisinnaatitaasoq tunineqarnissaa pisinnaatitaaffiussaaq.

Tassani pingaaruteqarpoq Naalackersuisut inatsisiliussasut sullissinerup sivilissusia qulakkeerneqassasoq innuttaasumut sivikinnerpaanngorlugu, tassani innuttaasup ikiorsiissut pisinnaatitaaffia kontominut ikineqarnissaa eqqarsaatigineqarluni.

**Pisortanut aningaasatigut allaffissornikkullu kingunerisassai:**

Inatsisip allangortinnissaanut siunnersuusiorneq naleqassanganneqarpoq ukiup affaani akissarsiat, 250.000 kr. missaat.

Pisortani, tassani ilaapput kommunini aamma Namminersorlutik Oqartussani suleriaatsip allangortinnissaani allaffissornikkut aningaasaqarnikkullu kinguneqarnissaa ilimanarpoq.

**Namminersortunut aningaasatigut allaffissornikkullu kingunerisassai:**

Soqanngilaq.

**Innuttaasunut aningaasatigut allaffissornikkullu kingunerisassai:**

Innuttaasut ikiorsiissutitut pisinnaatitaaffeqaraluarlutik tigusaqarsinnaasimangitsunut, inatsisip allangortussap akuerineqartup siunissami ikiorsiissutitik pisinnaatitaaffinnik tigusaqartalissaaq kinguarsaasoqarnani aningaasartuutitut nalinginnaasunut akiliisinnaangussaaq.